

寄庵詩文鈔

寄菴詩鈔續八 癸酉

雲南劉大紳

題瘦馬圖

固哉韓幹之畫馬天廐萬匹其師也定知籋雲追電中
無此峋嶙瘦骨者天陰日暮沙草黃烏鳶亂啄猶騰驤
幾人論功大樹下一顧重爲輕戰場

金碧草堂看牡丹

五柳陰翳五色瓜齊都越地久懸車正如海外神仙侶
何愛人間富貴花欲向閒中消歲月徑須藉此攬雲霞

開時不復愁風雨朱戶深深擁絳紗

客來無地可題詩四壁琳瑯在目時家世人驚投轄慣
風流自悔碎琴遲春深細細裁花樣酒半重重唱竹枝
情似遊蜂閉不得圓丁擔上蚤神馳

春曉望太華山

吁嗟乎太華山乃在昆池邊輕舟一日堪往還倚樓騁
望幾清曉如何不一躋其巔豈無登山脚豈無買酒錢
屐齒不曾折杖頭空自懸春風澹蕩拂襟袖鞭虬策鯉
可以相周旋青雲白石皆燦爛瓊花瑤草齊芊緜上有

采藥服食之飛仙排神馭氣升青天朝參玉帝侍王母
大醉歸來星月殘解醒欲飲一杯水茫茫無地尋仙源
昆池倒流三百里一吸不足心怏然飛入大瀛海笑傲
三壺間東岱南衡中嵩北恆西太華五嶽入眼猶蝸蠅
幾不知太華山外復有太華山巨靈有掌不曾擘仙人
有枕不曾眠卷之藏巾笥撫之拜几筵登高大呼衆山
應雲靈水怪心膽寒鑿池習戰務勤遠拳石不以當雄
關移雞移馬爲金碧漢武非聖宣非賢天生我輩行樂
耳山可遊也其遊焉風浴何與言志事喟然之與誰舍

旃吁嗟乎太華山乃在昆池邊我不能刀圭入口生羽
翰復不能洞天福地縮之庭堦前何不策杖如龍筆如
虎韓詩柳記摩崖鐫胡爲靜夜燈火晨相連呬唔佔畢
忘朝餐開門且語二三子爲賦春曉望山詩一篇

讀陶村集題辭

鳳皇之聲人不聞象以截竹渾難分鳥咽筠管豈能似
中有元氣相綢繆鳳老竹裂幾千載倡優雜進徒紛紜
正音忽聞三代後整冠危坐人何殷先生天授非人力
古乃不異今所云嶰谷解籜鳳生雛空山夜靜聲入雲

芍藥花

姚魏花事闌車馬日蕭索若無芍藥花蜂蝶亦寂寞春
風爲阿誰常恐負夙諾人言將離時贈此以相謔我無
同心人一任花開落

眞慶觀看芍藥

道士之居卽仙宮道士之手如春風春花催開百千種
風與道士分其功就中牡丹最稱好我未及來春已老
婪尾幸有芍藥枝不教人嘆花事了名花相見卽相親
欲笑欲語皆有神若使前身作佳士不橫白眼輕看人

經營位置亦帖妥珠樹尙右瓊枝左中有一種白玉盤
來當月下更嫋娜老夫常恐遊興殘雲飛霞散恨無端
誰知花神夜夜泣曾無一人倚闌干道士栽花忙不在
世人空記買花處可憐一叢深色花又抵幾戶中人賦
昨宵筮得東南朋廣庭曲室經層層浩態狂香汝自有
微歌短吟我猶能只嫌催歸鳥飛倦嚴城迅急傳漏箭
夢中阿誰乞金錢探懷大笑潤筆賤世間解事人無多
花神許我重經過再來便作不歸客嗟爾道士將如何

對芍藥作謝陳仰山

春燕呢喃春晝長蜂情蝶意爲誰忙
禪心不識花如錦
仙吏分來影亦香

和霧和烟意態殊似曾施粉又施朱
春風催放花王側
移得魏家專寵無

四月五日金碧草堂看芍藥同成都倪洪兩明府
及楊西園少府時少府將赴成都

金碧草堂春如海春風吹盡春猶在
主人愛客如愛花
客與名花曰相對昨來疑到洛陽城
今來直向廣陵行
大小牡丹吾不解芍藥草木人知名
三月四月無區別

風流同似花朝節望門蚤已蒸紅霞入座都將奏白雪
長愁枝葉生清陰蜂疎蝶懶難重尋若非先生留春住
草堂空說花木深如何春住人不任明朝有客成都去
識歸今日將離花魂銷他年擬別賦一時齊唱行路難
大家有淚紛闌干當堦仍舊翻紅藥誰人乘興還來看
喜雨 四月初七日夜雨如注先二日夜城南火

皇帝十有八年夏維月丁巳甲辰夜天乃鞭電鼓雷霆
扇風送雨雨如瀉初疑海水翻長鯨噓氣噴沫魚龍驚
倒飛上天仍下地徧爲膏澤苴蘭城旋疑天河先秋漏

滲作飛瀑到檐雷遙聞門外人喧呼赤土茫茫盡濕透
老夫喜極翻生哀雨師何不前宵來滌盪祝融熄虐焰
執筆不書城南災樂巴喫水秘仙術劉琨反風勢難必
登陴泥首無神靈瓊瑤玉瓚將焉質大臣誠格天恩多
被衣起立看滂沱終憐華堂與華戶灰飛露處無奈何

五華山武侯祠

漢家宮殿少全瓦丞相祠偏彩雲下南人至今懾天威
魏賊吳大供笑罵不知擒縱功成時曾否此山駐旌旗
雲來雲去昆明水神風神雨松杉枝當年一出龍不臥

五丈秋高大星墮荒營破砦猶駿奔廟門免胄幾人過
輝煌棟宇聞蜀中先帝昭烈同闕宮正統君臣本一體
蠻夷祇識諸葛公惜哉高帝與光武盛時未得公佐輔
遂令禮樂不復興後世無由見三五五華冉冉斜陽殘
書生懷古涕洟瀾山前生祠尙林立烏鴉亂噪紅欄杆
讀林先生松塢茅屋仙圖詩題後

神仙何嘗在天上十二瓊樓盡虛妄飛鸞駕鶴來人間
街談巷語半依傍我初學之經廿年大言白日升青天
誰知聚鐵鑄成錯凡人不識真神仙衆人熙熙入朝市

神仙脫畧名利宇衆人壤壤爭毀譽神仙於世無非刺
百年只結茅屋居出無風馬無雲車有時登山不採藥
有時臨水不釣魚長歌短歌興斗發溪風山風吹白髮
四望茫茫無和人歸來古槐上新月如此神仙獲我心
張君舅氏人姓林瓊樓相招更不去按圖茅屋深處尋

送陳海樓北上

讀書幾千卷行年及五紀此去官何官曰爲知縣耳知
縣民父母一縣待之理積縣爲天下治安原有以上官
貴且驕往往奴隸視誰識賢宰相須從知縣始所以負

氣人未衰便先止隱忍就功名亦有天下士二者將何
從惟子自處矣道術弟受師治譜父傳子仕學有源流
豈徒紆青紫匹馬上皇都五月薰風起君恩深如海臣
心清如水

劉母宋孺人八十壽

晉寧學博德堂兄之母

晴軒侍母蚤膳罷有客騎馬到堂下云是睽北吾雁行
廣文先生甚醞藉手持一紙新耿箋赤文綠字交相鮮
卷舒未及先色喜長揖爲母徵詩篇官堦何須論小大
祿養逮親便可賀生愁萬里離鄉園南望彩雲更無奈

佩章綰組昆池東絳帳戲舞生春風授几郎君是雛鳳
奉觴弟子如游龍登堂未從諸生後可無一詩獻左右
絕裾遠宦槐棘多屏帳遙遙說祝壽我亦曾適齊魯間
名公鉅製空寄還今年不待晴雪後乞文親戚怡慈顏

夜半讀書聲

帷燈熒熒月正午太乙老人臨下土青藜杖底飛炎烟
光聯奎壁圖書府世間慧福人何多仙謫星降悉難數
漢家僅一卯金刀誰道今時不如古綠牖朱闥高樓中
牙籤玉軸恣攜取亦有斷簡并殘編抱護欲與鼎彝伍

深知樂事唯讀書難禁呿唔心獨苦黃髮垂髻齊閉門
夜半有聲達庭戶是時絲竹寂不鳴但聞樵樓送更鼓
老夫抱膝長呻吟聽之亦覺神飛舞就中最愛鶉衣人
鑿壁偷得光一縷琅琅如出金石間暗記繪作讀書譜
爲問杯勺傾牀頭幾人下酒卻牛脯可能太乙留青藜
處處吹火照寰宇祇恐天上稀見聞鉛汞神仙半僞父
男兒何可不讀書如啞如聾復如瞽金銀伏獵悟無知
嘲笑頭巾太迂腐請聽此際非惡聲吟者是龍嘯者虎
山陬海噬生風雲頃刻旱歲作霖雨

原缺

數虫爲我如情多薄翼才濕聲已杳
援琴譜出移別宮
付與夜靜明月中琴聲蟬聲皆可樂
無爲振樹矜火攻
憶開化舊遊

形勝說南邊風流記少年看山秋雨後
立馬晚村前見
客吏何怒紀遊詩不傳大興雙桂下
曾泛酒如泉

紅水仙花

蓬瀛海外水茫茫權向山中築草堂
不信緋衣天上賜
昨宵脫却道家襦

記曾醉燕帝臺時紅暈如雲上玉肌
一夜仙風吹不醒

歸來猶藉赤龍騎

欲往湖心亭看荷花風雨不果

雲蒼蒼雨茫茫客心已到湖中央
凌波仙子悄無語侍兒挾瑟殊齊倡
綠葉素莖爭掩映荷花片片生暗香
角音一曲未終鼓大魚出聽頭低昂
碧筒杯如白玉盞細酌桂酒斟椒漿
醉中戲拈五色筆蛟綃拂拭雲霞光
錦心綺語人不解我欲讀之慚且惶
恍然自失如夢寐咫尺道路非阻長
生平每怪韓夫子走馬來看競騰驤
家船壁花豈易得憑欄睇視何所妨
道學先生談風月自

詡心境都兩忘卽令不風亦不雨酒澆肉陵堆四旁輕
衫高笠慵難著製衣葺蓋空相將湖中水鳥欲同夢不
識舊約誰聯牀憶余疇昔少年日謝游阮飲堪翱翔而
今漫說畢箕誤星辰豈與人較量荷花無情尙有恨湖
水可泳亦可方酒家螺蛤味真好金盞玉膾比尋常油
衣瓦爲付一笑儘許淋漓濕征裳小蓬瀛內卽仙界肯
教俗客徒奔忙

樂固坪周雅堂攜游郭家園

久識小園路雙扉愁不開金張每獨往沈謝竟偕來魚

爲迎人出花因入市栽無詩留壁上風雨不相催

同孫璞山過湖心亭

盈盈九龍池人家環相向孤亭憶昔年四面絕依傍長
夏游人稀留襟得疎放仙佛爭樓閣士女擁亭障今日
偕好友買舟無處榜風雨空相思花開少十丈不如讓
輕鷗汎汎波下上湖邊問酒家一笑揭新釀

金馬山歌

乍可使金氣高出北斗上日東月西識趨向不可使蕭
索沈埋南山下天用無龍地無馬憶昔漢家求神仙燕

齊方士爭摩肩聖主賢臣頌未了移文蚤到西南邊是
時君王德深厚河嶽靈供奔走金精神馬真尋常棘
水夷山太固陋一呼卽出再呼歸天子門前神欲飛追
風躡景幾萬里直驅黃道馳紫微不識初從何處來丹
穴白羽相徘徊苜蓿空肥大宛種苴蘭竟老天驥材鄉
中老人爲我說阿育內廐此迴別王憐季子欲與之金
羈玉絡防蹠嚙朝趨身毒暮益州呼之不聞肯回頭覆
孟山前忽匿迹至今光怪驚荒陬周家八駿亦龍族望
見片影股栗伏遂令造父折斷珊瑚鞭穆王西行未得

到南服我聞此語笑不止老人何勞費唇齒叢祠有鬼神
鴉飛金耶馬耶固如此

題朱丹木行卷

名護石屏人

羽陵蠹魚飛上天娘娘地老無神仙文星宵占入井鬼
大羅真人離箕尾石屏雲氣青蓋張老鳳攜雛爭翱翔
長風乘過成都府錦江掬水時滌腸浣花草堂信宿否
一卷投人人類首飛卿不死長吉生解帶又見雁門行

題折蘆渡江圖

江上舟人索渡錢一枝折得卽歸船何如逕賦蘆花被

笑倚帆風到岸邊

答趙子穀

名璧浪穹人

詩人不易有有亦人難知在五百年後轉羨生同時齊
魯吳越間壇坫類如斯何況西南徼嗜好多差池富貴
有鴻製貧賤無新詩其或宗旨異不獨唐宋歧北地與
信陽各自建鼓旗公安及厯下出入奴主之國朝
詩教盛車軌同九達朱南王在北炳炳宋與施四家足
千古聽人步趨爲後生不悅學金貂誇小兒譬如麇麋
藿豈復珍鼎棄又如羶裘煖文繡奚所宜山居見虎豹

水行失蛟螭徒愛鷹雉集何希鳳皇儀能者生其間中
夜愴以悲常恐風騷廢遽使性情移奮興及南服子來
自西陲神韻今使獨聲調兼能治僞體從此別俗病於
焉醫一篇忽遺我盡是瓊琚辭我學荒作吏童豁年又
衰所見皆老友無以爲大師奈何再三復以頌不以規
平生笑融禹後堂羅姜姬鄭彭高弟子未聞竹與絲茫
茫失模範區區設藩籬遂令千古下愧慚擁臯比束帶
盡青眼倒履多白眉竊願倚風月倡和如壘簞坐看秋
颺起倏忽天門馳社中少一士北望空嗟咨及今當愛

日一見一歡怡華山頽昆水豈有神靈司摩崖石不泐
好句將待誰

王眉仙和韻更答一首

未得時相見詩筒正不疎暫來旋復去積恨又何如馬
後休爲客人前莫著書且耽新句穩倡和及三餘

寄謝寶林

咫尺不相過知君意若何新秋風雨易名士別離多剩
有東脩在不彈長鋏歌幾時來一醉共去賦殘荷

答楊丹亭

分野同依井鬼躔遙遙蒙段漢唐年詠懷倒瀉樓船水
弔古斜飛戰壘烟名士何嘗隔疆域美人共說好山川
風塵笑我重奔走向回首游踪已渺然

八年歸臥舊林邱又作昆華汗漫游車馬聲銷風雨氣
烟雲影動古今愁稱詩忽到神仙客置酒如凌海嶽秋
借得清宵明月色還思卜夜更相留

趙州韓龍谷孝廉繼妻董孺人節孝篇

婦人守故夫以理而符情婦人撫前子情則緣理生翩
翩梁上燕孤飛恥雙鳴深山虎狼穴不以噬子名夫婦

之道廢世遂無君臣母子之義缺世亦無治平人情卽
天理後起失權衡一女百男愧貞慈其性成吁嗟董孺
人遠邇垂休聲

送趙子穀

計日作嘉賓言歸爲老親馳驅及風雨夢想達昏晨長
使浮名士高懷至性人到時勤視膳知汝有芳蕓
欲作送行圖愁心未易摹誰能如片月寫與共長途暫
別亦何限重逢非不虞衰年哀樂甚怕聽雁聲孤

壽楊生雨膏母周孺人

我不知少廣之山在何許是否崑崙與爲伍乃有人焉
居其間云爲得道西王母莊周著書多寓言穆武記傳
尤無根欲先天地後天地生老別自尋其源人生上壽
百二十百年三萬六千日更加一千二百朝清寧合撰
理可必蟠桃花實初無期青鳥去來亦無時何處更凌
希有背一東一西任所之君不見騰越楊生有賢母安
貞叶吉得其壽卽今七十古來稀何必瑤池老且久有
子林立吹壘篴文龍彩鳳雲飛馳諸孫羅列如玉筍繞
膝競進元王卮阿母一顧一莞爾善養祿養無殊矣不

識虎齒豹尾人皤皤戴勝曾有此是時南斗光在天一
星炯炯聯明嫵薰風披拂未消歇開遍方沼芙蓉鮮惜
哉翁逝七年蚤天不假之使偕老不然齊看斑斕衣戲
舞庭前一何好我於楊生愧師生知翁行誼如老更阿
母之賢耳亦熟恨不遠道稱兕觥索我一詩我何吝未
能珠玉並圓潤祝嘏自有真實言决不純蹈虛空陣楊
生謂我辭貴多我謂楊生意云何南陔白華幾章句試
向春暉堂上歌

慰武尚賓柯蔭塘下第

相期聯轡上皇都要與王家壯遠圖楚客多材偏泣玉
宋人善價竟還珠弓當滿處虎能射刀未藏時龍可屠
料得豐城雙劍氣張雷賞鑒不應孤

九日五華山藏書樓登高分得座字

箕星占右畢星左五華山頭洗堀堞重陽每愁風雨驚
此日風雨轉相賀不出戶庭卽高樓下視一行飛雁過
黃花白酒傾四筵一老首倡九老和少年更有謝眺詩
攜問青天通帝座上樓一九迎朝瞰下樓西南月半破
九日何處不登高詩翁酒翁有幾箇遙想百年後來人

尙說我輩此坐臥

昆明周張氏殉節詩

鳳皇和聲鳴鸞鳥爲之佐蘭蕙揚芬芳芝草香亦播人
物苟負異塵埃豈能浣妾婦羞丈夫心藏殊面唾蓋其
視生死猶如旦暮過行吾心所安自然非強作九州能
有幾昆華得一個姓氏翼軫聯於周侍起臥光輝初月
間皇問星小大夫死以身殉二招續只些不知死也榮
但覺生也愜醫藥將何爲牀蓐亦頓挫人或爲之悲我
實爲之賀貪生誰久長畏死自纏裹泰山與鴻毛先後

理則奈金寒環如玦玉碎鏡同破其事可特書有倡當
更和愧哉非昌黎辭可聞法座後來君子多庶以邀

王譖

風雨憶行人

濃雲黑於墨大雨傾如注有子何太愚攜孫此時去歸
家誰不歡只是行路難遙遙四十里無人報平安入門
須看人出門須看天天意喜風雨人情愛兒孫我若不
衰老疾走板橋道便攜吾孫還付與老妻抱幸今已殘
秋有雨不過溝俗語如可信不復中心憂

寄官保孫

連朝如此雨豈易到荒村每遇北來客便詢南去孫
夢余扶短杖聽汝叩衡門秋色斜陽裏全家笑語喧

送魏履端行後却寄

正當秋雨後掉臂向長途久客君非易離羣我亦孤
遙知鄰里望大有子孫扶不奈俱衰老難爲送別圖

得錢芷汀畫賦謝

人生得意豈復有千巖萬壑落吾手烟雲繚亂樓閣飛
顧陸荆關悉驚走錢侯本是蓬萊仙無端謫在昆池邊

太華山色看不足洞庭衡霍相周旋填胷邱壑真底稿
到處收拾忘昏曉偶然作畫如作詩人力天工兩絕好
怪侯片紙皆珍藏世間所得纔毫芒鯁生無緣插雙翅
安能逋逐窮八荒昨日齊頭瞥一見如此奇觀索不厭
知侯甚愛難強求暫欲對之置筆硯今朝濛濛雨不開
仙山海上齊飛來賓朋四座起爲壽錢侯德汝何大哉
惟我知侯侯知我侯失我得無不可買山若使金錢多
素敗縑殘尙扃鎖只愁蕉鹿還非真巧奪豪偷正有人
樓頭卽是書畫舫眼看寶氣凌星辰

送王眉仙鄉舉歸里

清秋桂子許先扳
驢背凌兢返故山
收拾軟春詞一卷
曉風駝出碧雞關

白雁聲高黃葉飛
計程幾日到朱扉
可憐巾櫛無人侍
轉憶當年不下機

遙遙黃耳走傳書
幼子今能執父裾
乍見多應還怯去
坊前好與買鳩車

舊恨新歡兩不禁
閒愁何暇說西林
難忘半載論文意
一夜長吟續短吟

九月廿四日溟州太守席上放歌同可石蘇亭芷

汀固坪對山香海六先生

秋風吹開瀲灩酒詩人詞客起爲壽正言周孔寓言莊
雅謔齊諧無不有或云上古無天札春秋皆度百歲久
或云今日風化淳人物未曾厄陽九尋常甲子安足多
在朝在野盡黃耆祝我耄耄而期願如古大椿謝蒲柳
是時坐中名士多嘉賓賢王記某某比於香山尙少一
於商山則倍其偶衆指之中難爲拇使我聞之欲驚走
我今甫過杖鄉年未及杖國敢稱叟尙齒况有石翁

如我止堪侍左右皆云降日各有期後月建亥前月酉
於日適爲二十四宜於我乎酌大斗海上試藉仙人籌
布算年紀分先後惟有香海歲差少我輩七人皆皓首
正得四百八十二藏舟應無大力負持較冥靈知若何
待得西池桃熟否常恐蜀人李八百過門不入疾掩口
袁翁掀髯忽大笑我輩各有詩千首固圯今之李伯時
芷汀摩詰是尙友合作一圖傳後世神物呵護鬼物守
俊及顧厨大標榜齊楚雖大非吾耦卽今但寫新鬚眉
圖成誰當再拜受君不見紛紛神仙說鍾呂丹青乃出

巾兒手膠西王相東方生古圖糜爛辨肩肘

送伯玉亭先生入覲

戀闕賢臣志籌邊聖主心國人皆脫劍使

者自攜琴萬里雲霄近三冬雨雪深天顏歡喜處

不在貢南金

不奈唱驪歌旌麾一瞬過心懸朝月冷夢繞夜烟多暫

別黃丞相終依馬伏波西南皆赤子瞻望更無他

魏履端得雋

科名裁與慰沉淪文苑蜚聲蚤出塵敝邑重看遊泮水

熙朝更許御蒲輪
盈門奉杖孫曾小
塞巷牽羊笑語
真欲問聽啼當日
客鄉村百歲尙無人

夏萬育下第

笑弄孫曾杖不扶
五華山半隱耆儒
只知皓首科名易
誰信青雲道路紆
投牒減年非老境
竊詩行卷是庸奴
歸然魯國靈光殿
蚤有人間繪作圖

擬秋雨歎

玉蟾滴淚金烏殘
日浸月濕天不乾
人間無事是赤子
怨聲易弭歌聲難
一年三十六夜雨
併作一秋虐下土

昔年之雨雨味甘今年之雨雨味苦

無朝無暮雨不止晝入眼中夜入耳溪水泛溢湖水多
室廬長恐蛟龍徙人戴魚首尙有時只今米貴歎晨炊
書生若爲身家計十千一剗安足悲

家家呼天復呼龍龍有九子天九重屈指秋雨連夏雨
轉瞬冬雨憂老農庭前幾株古柏樹枝葉青蒼正如故
柔歧弱穗何能爲幾時得聞歌五袴

送萬香海北上

如此男兒豈入下一官趨走何爲者南北驛路無盡期

自攜空囊策瘦馬他年知封何處侯今日未免時搔頭
腰中可有劍三尺未曾出匣風颼颼水有長蛟野有虎
尋常豕蛇那足數專氣致柔如嬰兒老聃片言可節取
一朝宰相知姓名薦之天子吾道行致身拙身皎
如日金馬山下歡相迎離亭且進故鄉酒寒風搖落道
旁柳南來北往簪紱多謝推鄧挽君知否

聞變

春暉未報蹙歸田長憶氤氲御座烟運際姬周經五
代生逢文武願千年縱教酷吏皆如暑豈許頑民不畏

天乍讀

聖明哀痛詔南雲
野老淚潛然

聞九月初六日賊入曹縣

多年解組夢猶馳
百里農桑舊所治
正憶友朋歡聚處
忽聞兵刃死亡時
官多善政無今日
民少神人不預知
料得重經饑饉後
荒城雞犬久無遺

擬蘇子卿古詩四首

人生天地間豈能不別離
言別未出口中心已愴悲
一
去卽長路曾面知何期
且進杯中酒味薄無苦辭
今日
猶相倚明日徒相思
愁懷不可說恨不共馳驅

丈夫志四方黃鵠舉千里丈夫離其羣黃鵠偕其侶
我無兩翅自應不如彼憶別久益悲賦別悲方始慘顏
何時休長歌書滿紙蒼天賦人情胡爲弗轉徙出穴還
入穴庭堦聚螻蟻

與子非蛩駘離合固其常安得大河畔從古無津梁車
馬自崖返歡會仍一堂出門視道路星辰黯無光入室
治鸛酒燈燭失輝煌蟾蜍抱玉兔含涕對嚴霜月圓不
如日天意何低昂

夕陽下西坂歸鳥返故林居行兩不顧平生利斷金方

知別離苦都爲膠漆深
肺肝苟不示何至淚淫淫
轉思形骸隔夢寐可相尋
正恐送別酒仍入夢中斟
此時何所贈共保一片心
他年重相見不作商與參

十月二十七日聞雁

多年望斷影悠悠未及聞聲已淚流
指點一行天盡處招呼萬里極南頭
禽先得氣知何向人正關心欲與謀
足下有書相寄否前宵霜信入高樓

擬左太冲招隱二首

夙有山水緣
蚤歲甘樵漁
倦念萬人海
誰歟遂其初
造

物貽絕境形勝時有餘何必金銀宮然後爲我廬門前
洪荒樹牀上太古書終年無客問寂寞京洛車風月幽
人宅所貴能安居寄詩招隱士此中得自如

空山無虎豹鹿豕俱相羊芝蘭陰松柏靜夜生清香比
鄰不厭密歡欣是同方沒者不啐井耕者不蓋藏周旋
閭巷間寧須問津梁逐逐營簪紱亦或階侯王猿鶴怨
昏曉林巒失輝光入山莫再計箕穎道不忘

擬王康琚反招隱詩一首

步出城西門悵望西山巔有人何爲者陸沈方盛年山

南虎有侵山北鬼有權
置身層巖上失足墜重淵
地上非一山一山隱一賢
母乃萬山中萬賢若比肩
仁獸在郊椒靈芝供几筵
如何不歸來桂樹相連蜷
君歌鹿鳴句臣賡天保篇
隘哉採薇詠長怨羲農前

問訊龍泉觀梅花

朝花不及暮春風不迨
秋霜雪既有時百物爲之愁
翛然古梅樹卓立空山幽
若非仙人遺久已摧薪樵
手植五百載夢繞十二樓
不知年歲晏精光射龍湫
美人怨清夜良朋阻遠遊
如何不相思相思良有由
寄語山中

人今日花開不開時我當來旣來我當留更得明月共
形影相綢繆仙人惠我厚外此何所求

同錢芷汀張小東龍泉觀賦梅花

朔風吹雲不成雪五華山頭度曉月東園西塢寒香多
夾道梅花已清絕老夫自與仙人期抗顏五老償新詩
寧知半死半生樹竟是如泣如訴時蘚苔糾纏螻蟻飽
南枝摧殘北枝槁賴有元氣相幹旋根柢不隨地維倒
細看花從何處開精光結撰空中來屈蟠蛟龍蛻骨朽
遺珠迸射金銀臺真仙種植本難測空山千年尙生色

古香在骨韻在神唐斤宋斧忍戕賊世間不朽湛清名
此物之名亦同清林風潭月無盡處行人藉藉論枯榮

答柯蔭堂留別

故園多老友道義相扶持君強名曰弟強名我曰師今
年不得意言返東山陲遠探梅花樹忘折楊柳枝歸來
君已去橋頭落帆遲相思夜有夢未必不參差千秋心
膽共冰月照昆池家鄉會合易聊可慰別離孤燈小閣
夜又和蘇李詩

赴卽園招飲同錢芷汀

折簡傳來字亦香醇醪未飲興先狂聞知看待詩人處
百樹梅花一草堂

二老風流處處偕羞將杖履入官街五華山徑行人少
買得蹇驢應更佳

李占亭邀同錢芷汀謝石臞唐二南卽園賦梅花
張小東已至復去

詩人邀我過卽園中有百樹冰雪痕九龍池邊遂迷路
時時錯認鄰家垣香風迎人出戶牖青蔥竹外社籬籬
梅花如友友如我幽軒靜對無多言昨朝五老抗顏色

不尋斷橋尋斷村龍泉別院一傾倒便欲屣視桃花源
終嫌老人惜筋力置鼓記里聲猶繁傍湖一徑小曲折
不待月下裁敲門人生清福易消受安排竟日飛金樽
神仙既來又復去名士往返如蝶翻今年羣花盡入眼
強半沾丐春風恩高寒骨格遠神韻衆香國裏應稱尊
詩人相視却大笑千秋尙有尊者存前身後生豈足計
第恐詩未窺宋元中宵且與刻短燭遮莫亂草堆邊蹲

南山寺看茶花

南中草木天所私北人不見空相疑如此茶花世希有

深紅艷紫冰霜時或云南離象爲火飛烟煽焰如炎曦
赤龍蜿蜒百千丈躍出大冶驅元螭或云后羿射九日
當年墮落西南陲金烏神彩不終匿陽精上燭光陸離
卽此山中亦自好我輩禁酒難禁詩層霄若不昂白首
尺幅枉用吟折枝茗柯妙理尙言有七十二種將徧窺
願從仙人五雲裏賭取彩鳳來朝騎

思茅陳貞女詩

不意天壤間第有貞女子夫婦如君臣大道重倫紀姓
氏旣已通何必共牀第從一不徒生有後不徒死妾身

無姑嫜未亡人何恃蓋棺吾論定取捨固有以女子胡
能然在畧涉書史男兒讀萬卷埋頭理故紙忍心負
國家堂堂中州里誰謂西南夷閨閣乃如此執筆三歎
息寒硯結冰水

甲戌嘉平朔日寄菴先生付續鈔詩九卷且命序瀛悉
心讀之其自序曰詩文之傳與不傳以詩文不以序也
得如張莪石者一序足矣載讀後序曰技而道固詩之
本道也詩也似契似離純純各歸無所容心名論卓然
矣瀛何人尙敢贅乎雖然重其書以告後之讀者瀛固
不敢望莪石又不可以不文辭竊觀夫元氣之齋淪也
其時熙熙其光杲杲其風穆穆其雲英英其露灑灑其
物迭迭其形昭昭其聲調調其音含少其於人也臥徐
徐視于于終日號而嗑不噉動若水靜若鏡應若響無

實無虛可與道俱亦曰率真而已矣自然而已矣先生足乎已無待於外時物行生虛而乳之動靜語默安而達之會以偶然應以適然是以去識不鑿離塵不鏤恆言爾而和天籟習字爾而益曰新機盡天也理盡趣也聲盡化也藹然元氣哉藉非真也奚以率非率真也奚自然讀者由是而領言外之旨可也或曰先生之續鈔時閱九年詩幾千首子以率真自然概先生詩示學者的似未足以盡先生也瀛曰然然否否先生故與道大適者也道法自然率真者自然之流露自然者元氣之

端倪先生之詩亦寄云爾寄云爾未知莪石以爲何如
臘八之辰爲客歲隨侍龍泉觀梅前七日後學張登瀛
謹識於長春洞

寄菴詩鈔續九

甲戌

雲南劉大紳

李占亭贈梅枝

張筵無好賦又寄兩三枝雪後半開處烟中初折時出
門蜂蝶戀過市鬼神窺待汲幽泉水寒香護定瓷

錢芷汀邀往太極宮看茶花遂至定光寺

同令子

華麓令姪香岩楊生右洪

吾鄉之人不自銜潛巖伏谷甘貧賤吾鄉之花亦如之
艷彩奇葩少攀援欲終其物更僕難雲飛霞散日常眩

請看斗大山茶花可曾移栽上林徧使其無冬亦無春
千龍擎珠慣酣戰世人儘有蜂蝶情紅紫叢中浪遊行
此心獨惜昌黎公遷謫不向西南便青龍寺底逢仙人
韶稚忽驚顏色變炎官火傘太鋪張乃是赤柿葉萬片
假令當年見此花陸渾山火且徒煽惜哉花與公緣疎
兒女旗槍遂爭羨我輩衰朽無寸長小詩求工只如諺
根柢合抱枝撐霄登樓纔得映人面僕夫急趁斜陽歸
太極定光兩留戀肩輿迴首心懸懸隔牆瞻望大笈精

再賦茶花一首

金鳥飛上搏桑枝三千丈樹光陸離紫烟赤焰倒射海
怪魚震動神龍悲乘黿仙人昂首嘯造物功用何其奇
火齊碎瓊木難瘦瓊花玉圃空華滋昆明湖上客莞爾
仙人未到西南陲嚴冬九旬雪霜冷赤帝炎妃相遊嬉
朱幡高張絳節擁文蚪彩鳳爭奔馳遺鱗墜羽不收拾
散落山顛與水湄年深歲久鬱精氣蒸成萬顆紅琉璃
綺揚繡合少空隙銅根鐵幹相扶持若今天上和露種
何須爛漫星雲垂雷桐著錄未經採援玉茗例相名之
可憐此物天下少世人乍見羣驚疑謂是巨靈赤雙手

丹山夜半輕推移剛逢千年一燒候灼乾燭坤傾赫曦
不然冶公作良冶赤龍帝遣來迎時日出日入億萬里
何處草木曾如斯遐方豈無好事者千金買栽總非宜
張筵燕客尺寸計親嬭竟自呼女兒一歌再歌有餘興
吁嗟我輩真能私

上元夜獨坐

此屯蟻聚屬春宵馬後輿前各自驕幸是清吟還有福
若非獨酌更無聊新聲月下移何調隱語燈前射幾朝
聞得軍門傳令箭嚴城不鎖漏迢迢

十六夜同張西軒劉召蔭唐安仁上五華山

火樹爭春榮明月競水瀉此時不出遊豈是有情者六
門無鎖鑰三市多車馬言上五華山不嫌儔侶寡地濶
天斯空居高好視下催促玉漏中銀燈易以炮物力微
竊緇人事聽取捨顧語二三子隨時適風雅幾年閏元
宵春風轉瞬夏

開學日勗諸子二首

大道不遠人君子盡在我堯舜雖上聖爲之人皆可義
利苟不分遂至如水火卽以科名論其理亦非左得失

無容心惟當計勤隋馳馬不銜勒乘舟不櫓柁一年復
一年環顧慚負荷

憂道不憂貧先師勤告語所以屢空人當年稱其庶許
衡先治生饑寒代爲慮高位今如之士皆得飽飫若不
策心力毋乃太自恕雞鶩謀稻梁鴻鵠遠飛翥俯仰天
地間何從又何去

聞城頭曉鐘聲 二月二十三日

桑顛雞語天欲曉十萬人家夢未了長鯨掉尾蒲牢驚
南城樓頭片月小我亦深山高臥人邇來不寐苦年老

宵終危坐無惡聲第見虛室白生蚤空堂豈有金石鳴
銅山西峙未傾倒大叩小叩者爲誰一百八聲入耳好
其初入耳旋入心萬慮紛紜盡從掃人生醉夢無時無
此物居然是師保狐妖鬼厲偏相憎世事如斯那足道
呼孫急起休安眠開門東方日杲杲

賦白牡丹二首

同是花師手種成開時風韻獨何清帶來一點山林氣
辭得千秋富貴名孤鶴舞餘初不辨落霞飛盡始分明
玉人多少含羞處半醉朱顏薄暈生

止欲簪花雪髮盈朱闌紫檻獨關情不因澹極春無色
那似愁深月更明宰相自緣金帶重山人終爲白衣傾
好將吐鳳揚雄賦寫向花枝寄玉京

白鶴橋孫仲球宅看牡丹

錢記歐譜讀終卷天上殘雲落一片閉門不知春色深
名花今日裁識面我生百事皆有緣五十種餘眼曾見
夢中好作園林遊醒來猶覺目光眴白鶴迴翔門巷深
紫蜨黃蜂隨輿轉孫卿有力拔其尤不在新奇態百變
從遊誰是青蓮才乘醉揮毫逐飛電文章羞作過眼花

聲價逢時亦不賤三舍退避衰年人遠看雲霞五色絢

望雨歌

又二月初八日

雲作殘籜驚風作餓鴉鳴豐隆無力難相爭種禾日以
老種麥日以槁田祖有靈心如擣天瓢乾裂天龍逃雷
公追捕空焦勞重淵睡醒已春暮肥蠶旱魃恣由敖我
爲視蟻穴其封未成埵我爲聽鳩語逐婦正切切天雨
天晴微虫知甘霖有作將何時無雨無食盜賊起有恆
心者無幾耳吾君吾相深爲憂吾儕小人亦所恥
望雨歌淚滂沱萬慮紛輯膏中宵尙竚立不願天漢箕

動搖但願離畢月光溼

答王玉海

天下之才共一石詩人之數恆河沙分才與人徧不得
天公無計長吁嗟往來古今億萬載兒時學語先矜誇
等閒老矣如我輩誰者名家誰大家尋香掇翠過蜂蝶
捕風捉影奔麝麝清詞偶然若口出餘慧拾自前人牙
詩翁最苦不自量泥醉亂舞癡龍蛇殘煤禿毫旣可惜
塗牆抹壁尤難遮才人嗜好得無異青眼驀地生虛花
多應醜婦刻畫慣遂教駑馬鞭笞加否則蒼蠅附驥尾

因錢及劉不我遐卽園之遊亦何幸詩情狼藉香風奢
園丁不隨落梅掃竟同好賦齊籠紗當時事過輒相忘
因君又憶寒烟斜公房聞之定見笑此翁才盡何爲耶

哭錢芷汀先生

專集和淚陳尸前拊心欲問蒼蒼天此人此詩世無有
何至汲汲埋重泉將毋鬼神守成例東陵歡呼首陽斃
卽今委形嗚咽多踰月幽室一以閉山川雲物春復秋
昆池望斷仙人舟龍泉老樹且未死歲暮花發同誰游
生離相思輒入夢夢中怕作挽歌送一朝死別長不歸

千秋尙有我輩痛

看花吟

春藥未開牡丹殘杜鵑花下春風寒一年花朝有幾度
如何今年竟兩悞看花須有酒有酒可無詩詩人老且
病獨往將何之人生遇合有遲早草木區區傷懷抱誰
知一死不復生花開花落復何道詩人之詩古則有詩
人之風今無耦對花且爲詩人悲天道茫茫疾白首

讀蘭芷菴先生滇南本草

芷菴不世出萬里甘賤貧於已自不惜草木嘆沉淪維

此西南徼地勢聯崑崙西望三天竺我實爲東鄰仙鄉
接佛畛不產尋常人山川有餘力醞釀皆奇珍世人所
見小聚首譚金銀披沙旣瑣屑採礦尤艱辛靈藥徧地
有烟雲日相親婆心兼苦口一一爲指陳得之可不死
入海看揚塵奈何黃岐遠屹藹供厨薪秘笈傳鈔易坐
誦長欠伸嗚呼三代後鑒賞誰有真先生尙如彼草木
何足論

王子宣蒨滋邀同諸君子真慶觀看芍藥花已殘
過金碧草堂復值主人外出遂至迤西會館燕

飲

昔日金碧草堂品芍藥不如真慶觀中更純約座間有
客皆能詩卽席未曾覩佳作今日觀中花已殘轉羨草
堂尙娉嫋老人曳杖出門去行厨移尊少酬酢重尋別
餽恣歡娛心雖欲前足猶卻始悔昔日雌黃多詩家議
論有厚薄人生富貴如傳舍耳聞田實與衛霍何況區
區一草木計較盛衰直旦暮古今不朽是何物我輩解
衣且磅礴酒邊青青見麥隴搖浪翻風擁高閣大鄉小
邑半枯槁似此原隰殊不惡來朝又是耕藉期安得靈

雨應候落農家婦孺飽餽飪不用將離輕相誑當階藥
闌任寂寞縱無一花正足樂我且更番大斗酌

節婦吟爲鍾兩生母崔安人 鍾生國泰國安

蒼松枝霜不折寒潭水火不熱蒼松有本心寒潭自清
冽維人則誰同節婦之高節一與夫齊矢終身豈以蚤
死義中絕夫有母在婦職修夫有子在母力竭節婦賢
哉子亦賢雙雛飛來丹鳳穴史家傳之我歌之節婦之
名不可滅

同謝石臞唐二南張西軒小飲後步憫忠寺西軒

望滇池如半月形

烹鮮問鯉魚詩人共小酌
夕日有餘興更上古佛閣西
軒面華開青蒼露崖嶠側
見昆明湖清光激林薄天邊
失片月細認此閒落姮娥慵
不收水仙憐綽約倒流三百
里周圍浸山腳所見如今夕
半壁倚空著借得漁人并身
向月中泊

螺峰山

颶風吹翻海底水羣靈百怪
夜驚起青螺不識滄溟寬
徑挾波濤遠遁徙昆華僻在
西南陬度量去海幾千里

來不返忘何年化爲危巒側障秀相倚登攀正恐滑
人多羞與衆山共刻施藤垂葛蔓無坦途上刺冠巾下
鉤履仰看飛鳥身何輕我輩竟似穿珠蟻崖傾石側空
中懸風過雲移懼崩毀阿誰作書寄珠宮駐遣神蜃出
海市吹噓便成金銀臺不曾聞閭閻罄骨髓有徑採芝鮮
如雲有屏探霞散如綺使我勸極還長吟如見蒼苗濯
清泚信知好詩多在窮愁時好境亦在險阻裏一蹴卽
到將何爲一覽輒盡非所喜從今但索素女鸚鵡杯不
向穆王造父借驂駟

望高嶢山懷楊升菴先生

益州千巖復萬壑，畜雲泄霧互噴薄。
韓蘇遠謫誰經過，楊家老子天上落。
戎臣易安是容膝，墾土誅茅且相度。
高嶢之山如拳小，至今名欲匹衡霍。
當年撼門無哭聲，烟霞何由慰寂寞。
林騰澗喧有餘幸，幸是逢君得摠幕。
我昔弱冠曾登堂，氣節文章宛如昨。
太華片月相照處，六子有靈尙醺酢。
回頭五十移春秋，未買村醪薦瓦爵。
神祠鬼宇荒淫多，出地入天盡丹蘄。
此山畢竟屬先生，瀋陽范公久不作。
清晨西望淚雨瀉，弱水壺嶢安所託。

謝石曜遺大城江魚

大城江與明湖通潭潭萬古蛟龍宮巨魚出使衆魚騰
雙眼射水波光紅清晨敗浪暮未已風翻雲亂失涯涘
臨淵一向垂涎人不敢長竿繫香餌知君得此良亦難
野老指動殊無端歡娛何嘗竟蕭瑟昆池落月窺冰盤
弔二忠墓

有元之季天心移昆明僻壤將焉支前王不務勤遠畧
遣使諭告寧非宜其奈梁王固宗室難援朝鮮就封律
沙漠況有遺孽存僞命紛紛日交惕浙東大儒齊宋濂

星霜萬里君命嚴日月光明燭火熄大言入耳何炎炎
梁王縱然不懷德天使人才萬夫特多方護惜藏民間
人百其身贖不得維公視死真如歸不論成敗論是非
廟堂籌邊有長算絲綸又出青瑣闥在唐韓愈使庭湊
元翼猶能潰圍走希烈徑殺顏真卿面色如生爪拳透
盧杞藍面原奸邪前朝智勇推官家蚤教潁川大功立
忠魂何至招天涯城東歸然見大冢天球河圖等珍重
山僧野老無所知盡能寶此荒邱壠我聞仲緒求父屍
血淚遍灑西南夷至今子孫尙覆醢何由馬鬣封如斯

或云忠節實葬此忠文祔之成兩美二公自在人心中
里言即可當青史世人怕死何爲哉牖下遺令深深埋
長陵幾人曾下拜玉襦珠匣徒生哀盡如二公骨不朽
有不朽者鬼爲守赤天白日陰風生古柏森森侍左右

鳴鳳山

集何必紫庭巢何必阿閣鳴何必岐山第使中國聖人
作藩籬四海囿天地趾步羽飛慶咸若西南萬里關巒
多雄鳳雌皇此間託一鳴蠻人驚再鳴蠻人樂因以名
其山勝於紀神爵惜哉去今幾何載傾耳不復聞大畧

當年胡不將九子卽以此山爲土著醴泉潰涌而四溢
竹實香甘以錯落百尺集梧桐千仞入寥廓弋人夫何
篡丹穴竟奚若一去不復來延頸悲元鶴噫吁嘻凡鳥
啁啾鳳蕭索中律中呂第喤噓馴狐幸晝伏無聲尙不
惡我且信宿深山中坐看喬雲出林薄庶見文鵠與彩
鸞同類相招集綿絡

爲龔石樵書畫美人扇

莫笑畫家情太癡玉顏澹點碎燕支世間不少封侯相
寫入圖中總不宜

飲吳井水

千村萬井勢相懸此是昆明第一泉
調水無符真味少猶將普洱貢茶煎

鵲橋

傳聞天孫夜渡河金風掀蹴銀濤多
驕鳳怯風氣力少駢逐烏鵲如黿鼉
雲微雨疎駕雕輦珮玉鳴鸞共宛轉
迴翔背上安穩過笑說今年水清淺
銜尾接翅毛羽殘綺霞一片遮闌干
天漢弈弈光正白兔停烏匿良宵寬
斗然天雞一聲悞析木津頭又西渡
微禽有臆不敢言

兩情脉脉正迴顧我聞天上乘雲霓瞬息萬里人難窺
小視銀潢一衣帶却勞烏鵲奔波爲共知星官貴無比
誰爲此烏恤生死况是東鄉相思深歡會一年一度止
君不見月落烏啼官道周人車人馬無時休

贈萬古厓

碧雞坊外草堂閒白石高風正可攀書讀唐虞三代上
賦成漢魏六朝間幾人一出兼伊呂吾道長年樂孔顏
只是客邊時有夢秋風吹到故鄉關

讀淮南招隱士

叢桂倚山塢幽人樹風榭清秋口以至芳馥歡相許城
市隔幾許暫徃情不暇云何作長歌賀然招之下嗟哉
淮南王畔逆罪無赦八公亦奸黨萬世供笑罵著書猶
可傳成仙已太詐有辭嗣騷經言侔道乃差高臥山中
人了不聞悲咤老樹長淹留沍露酌瓊華同居貴同心
安車莫相迓何不反招隱以編九辨亞千秋長太息香
風起丙舍

中秋夜對月

五華深處且流連有此清光豈偶然句未就時愁夜雨

杯當空後問秋天如何離別多今夕不使團圓似舊年
歷數半生遊覽地山頭海角渺無邊

擬陶丙辰歲八月中於下潠田舍穫

荒山無膏壤力田冀逢年不耕豈有穫鹵莽亦徒然沮
溺去千載至今稱其賢此耦何由得黽勉齊細民秋風
度隴首西成有餘歡夕日喧鳥雀牛羊臥晚烟植杖不
知返湖山正澄鮮且盡一樽酒取醉無多言

擬陶九日閒居

人生視天地修短殊相懸春秋倏而至代謝任自然采

菊易盈把空罍難爲歡仰視寥廓際清氣相迴旋閒居
順時運道在忘寂喧第聞木葉落鴻雁聲高寒羲皇邈
然遠吾意如比肩餘生幾重九痛飲期年年

九日得夏萬育書

正是相思候傳來遠道書秋風親繫雁江水自烹魚我
輩貧應爾世人老不如登高懷舊侶離別已無餘

贈畢青田

青田於我不相識乃肯爲我篆姓氏若非慷慨悲歌人
定是嶽嶠厯落士昨讀古村戴生詩放厥玉珮瓊琚詞

紛紛可兒數不盡欲呼隸邈丞相斯不然陽冰亦其偶
片石能齊五岳壽世人有眼無雙瞳却望黃金印如斗
禿錐刻畫爭相先龜盤螭結銷雲烟我當與君酒樓上
一醉解質青銅錢

夢張漢渡先生

我於張夫子無日不相思九年未入夢存歿空生疑黔
山出雲漢猛虎當路歧灘石橫楚水在飽蛟龍飢輕帆
未易買駿馬難奔馳霜風昨夜冷倏已親須眉手執巨
公札夢中記其姓妙語人解頤上言園林小有亭兼有
名覺後忘之

池下言平生友時時得見之見之以圖畫見之以文辭
履舄儼交錯杯酒歡相持欣賞書在本秉燭光正宜天
際一聲惟樓頭斜月窺驚起擁絮坐問夜如何其同處
天地間會合艱如斯至令夢寐底亦復輕別離可笑武
皇帝欲與仙人期神山太縹緲那得風不吹爾思室是
遠唐棣豈吾欺作書寄我友爲釋中心疑

晚菊

棄置牆陰下天寒一雁窺能令秋有色不使世先知於
物原無恨如人亦已遲延齡全仗汝泛酒正盈卮

生日屬諸弟子賦詩

寄菴賦詩一千首不曾蒼黃祝人壽每當九月初度辰
長歌短吟却時有今年又屬諸門人聯章綴句爭鮮新
皆曰吁師何爲者此小技耳安足陳諸生豈無錦繡段
自愛單衣適至盱諸生不少流霞杯醉後恐橫白眼看
以詩紀地兼紀年詩傳於世人卽傳不問冥靈大椿樹
何知滄海成桑田聚散盛衰况偶爾遠道相思淚如水
春樹鬱鬱雲蒼蒼呼出卷中儘堪喜我昔竊祿東海間
二十餘載徒汗顏窮官歸來有囊橐錦屏玉軸高於山

雖然母在不言老吾母亦願吾壽考壽榮壽辱皆及親
惟冀諸生善頌禱皆曰唯唯試爲之閉門對客無不宜
開襟據梧讀未半秋風拂拂過東籬好采黃花入酒椀
招邀參軍與中散百二十年如此間有觴有咏吾意滿

自壽

嗟我詩不及二千首飲不過五六斗官止於下大夫而
功名不在人後謫戍原非辱薦辟固希有 九重

天子恩遇深一朝賦歸實孤負 天子若曰予一人

知汝臣拜稽首小人幸有母母年八十臣六十願遂烏

私侍左右十載承歡是菽水轉思東國一縣甘旨厚五
華饒有束脩羊山長厠名愧老醜諸生於我偏依依去
歲登堂爲母壽今年值我初度辰經霜禽華照戶牖
屏緝障皆輝光我固辭之則否否我云楮毫自不朽紀
地與時庶可久吾鄉要是人才多近日兼知涉韓柳我
豈能傳向歆學我豈能爲一錢守縱然海岱留畫像未
必歌哭及孺婦使我慚惶不敢受正如千金享敝帚從
來弟子專諛師門外行人早搖手毀譽榮辱寧有常不
如開懷但飲酒

送楊碧泉同年旋里

三年一見甫經旬，又向離亭擁路塵。
金馬何緣嘶月夜，碧雞竟欲唱霜晨。
衰顏且喜同依母，晚節相期莫厭貧。
會合更教能十度，甘心長作送行人。

題沙雪湖紀游詩後

杜老不到處山川，自珍惜獨與混沌初。
元氣共朝夕，萬丈松不燒千尋雪。
常積熊羆長厥妃，蛟蜃安其宅蠻夷。
固紛紜習見無創獲，番僧據西域且勞語。
重譯竊窺天地心，中外罔睽隔。
已通金銀賈，何怯風騷客。
九州復九

州宴游雜履屐詩才一賦與淳時並受厄毛髮相爬梳
無路匿精魄幸茲奇怪多尙未遭刻畫辟彼玉在山爲
璞弗爲璧又如初生孩肫然色正赤何來沙雪湖嘯歌
太惡劇時時傲杜老秦州枉行役不恤山川靈嫌君相
逼迫遂令衰年人口吟手不釋恨少黃麒麟飛空振長
策臥游自今始封詩寄勒石

哭李靜齋父子其伯子余女婿也

依依話生別重重數歸期垂老戀親戚記我初行時此
來曾經幾寒暑世間無情是死鼠蒼生性命如草菅安

樂難尋一片土天災流行遍南陬殘屍枕藉成高邱尋
常行路且悽愴君家與我恩誼周傳聞然疑淚如雨真
箇父子弟兄死鬼吹燐火陰風生怪鴉夜呼坐驚起歸
到浣江江上村梅花樹底空招魂城東內弟得死所李
林病衣冠送葬西山墳

送迤西諸子應試

明日碧雞關前月他日點蒼山上雪少年伴侶多神仙
飲酒賦詩兩奇絕老夫若是丁中年尙能快馬揚長鞭
髦矣畏路如畏虎縱有山水心茫然男兒生平感知遇

騏驎長鳴伯樂顧新都才子垂柳篇苴力舖前一老樹
道旁人往人來多爲問生意今如何愁渠斜陽暮雨外
寒空一陣烏鴉過岡墮樵蘇及松柏溝壑魚龍少窟宅
致身合在青雲間盛壯年華莫輕擲

送許特升歸

汝師是吾友秋風昔別殊匆匆汝今又歸去霜寒竟不
少從容言旋故鄉本樂事師弟偕游更快意點蒼西洱
登臨間相思還應爲我計五華山麓春雨晴九龍池畔
春水生雁去燕來不曾誤綠楊陰裏認前渡

寄張亮衡

古人贈言取規諷德進業修亦名重此風隳壞由六朝
公讎酬答竟何用大華山麓湖水清才人間代文昌生
詩筆直追正始上建安以下心相輕清秋爲我寫生紙
媿媿千言意未已湯盤孔鼎流人間瓦礫羸秦碧玉璽
裁驚寶氣凌斗牛旋看劍影沈龍湫坐令張華與雷煥
悵望神物心悠悠從來文章本天定成毀遲速亦逕庭
居士泥腹山人瓢千秋膏馥尙殘賸怪我聰明不及前
崇朝過眼如雲烟胷中依稀記大畧何似整幅書長箋

君不見佩章佩弦各有取見仁見知皆吾與又不見佛
言瞥見優曇花至今開遍青山涯

聽雁

中庭久佇立形瘁神不王於世何所希傾耳屬天上忽
見北來雁雲霄自飛颺處高響斯遠一聲發昭曠成行
儔侶多先鳴若爲唱衆和曾不孤次第引其吭哀樂誰
能知知非俗塵狀南荒無鳳凰鸞鶴見亦創入耳休厭
煩相與拜嘉貺視影烟中微尋聲空際徹今夜殘月明
登樓更騁望

早赴僧寺見木蘭花

早行見月如滄洲自問老翁何所求
道旁蘭若出天上鴉翻鵲動依山
樓僧籬開門正埽地對客擁簪聲
呶呶笑指木蘭花兩樹鏤雪刻玉香
雲流若非早來恐花落多謝天女勤
護留此心忽到木蘭舟烟波渺渺雲
水秋吹簫搦管彈箏篴美人迭勸玻
璃甌晝夜爲樂歡未休此間久立中
心羞老僧飯罷多綢繆明歲花發重
來游

夜寒不寐

長夜寒風吹侵人枕席上欲起天未明
開門失所向恨

昔讀古書賢佞識其狀褒譏吾有心人與事俱往未知
生同時可能肆旌創古書誤今人徒使心養養恐留今
日詩後人又倉兄

冬

冬十一月雷雨雹我方吟詩擲筆作吾滇僻處天西南
三十餘年疫氣惡百萬人殉死鼠死怨魄冤魂溢城廓
鬼神有何不稱意豈其以此爲娛樂或者氣機原偶然
行見鳳麟在郊閣儒生安敢不修省舜蹠人禽自忖度

讀忠節錄

嗚呼吾滇乃有此忠節雄魂毅魄日星揭其死一百六
十年我今始得誦前烈是爲路南歲貢生貴陽郡丞仕
於明厥姓楊名曰以成水蘭霑烏苗叛嬰孤城城破身
亡家同傾闔門十有三人引頸受賊刑第亦傳書被執
甘殉兄事聞祭卹祠廕昭忠貞史冊書之金石銘如公
何遽遜張許卽段太尉亦其伍世無昌黎與河東一代
文章兩鉅公執簡萬丈飛長虹落墨百石撞洪鐘使公
得與天地相始終而我才弱思孱究何用望古遙遙付
一慟嗚呼安得韓柳復起爲公重

雪

天寒人易愁，愁極轉生悅。解事是滕六，爲雪陽
氣從陰凝，元精固不泄。旣使來牟宜，又俾惡氛滅。吟絮
雖才高，尋梅亦志潔。要知造物意，端不爲此設。凍餒固
時有，盈尺卽當輟。更求晴霽初，空中彩雲結。

憶龍泉觀梅花

長望山中雲不踏，山中路去歲梅花開。故人伴我去，

早起赴龍泉觀

樹底醉歸裁一年，仙宮有約卽爭先。城頭片月休相笑，

不爲看花只斲眠

扶桑去歲上朝暾
願畧烟痕與雪痕
長恐美人先待我
吟詩早到水邊村

鍾永清治亭主
澍滋李成之同往
龍泉觀賦梅花
五老峰南臥遊候
常到仙宮古樹右
根藏螻蟻枝封苔
橫理直紋隱篆籀
一綫不絕便著花
積雪層冰暗香逗
正如鐵石心腸
纖媚賦憲事小吏
分句投復如朱鱗
火鬣傾明珠十二
車乘照前後黑龍
夜半來深潭雷霆
霹靂逐戰鬪風止
雨霽窺殿庭丹柱
斜紐爪痕透想見
真

人手植曰元精元氣彌綸厚爲唐爲元未可知要與宋
相閱世宙四圍衆木都青蒼低首甘讓此物舊我見花
開歷三度今年較如去年瘦方亭節相圖記存絜量十
難八九覲心恐遽歸閬苑去世間凡材競綵繡自思後
生幾百載少年形容已不又况憐昨日同遊人北山沉
沉石包匱今年幸有高材生摘藻投華擅文囿一年花
下留一詩萬古詩人共馳驟神龍在水仙在山梅花在
樹卽三壽枯榮譽毀吾何私詩成大笑雲歸岫

趣刻詩

折得梅花要祭詩
棗梨鏤版尙嫌遲
分明不與饑寒事
臘鼓鼕鼕歲暮時

李占亭延賦卽園梅花分得到字

繞屋梅花開有客
鶴先報經過無俗物
苔徑時一掃
明月照牕牖
叩門人衣縞
相對吟新詩
欲壓孤山倒
慚我傷哀樂
風雅固難到
才子輸少年
騷壇擁旗纛
杯勺且不勝
頽然負夙好
終筵何所思
插花自寄傲

分賦梅影

一見梅花百卉降
若非對影更無雙
澹拖雪意斜臨鏡

清帶烟痕倒入江最惱疏鐘催落月尙憐殘菊射明鉉
誰人散筵千金享掃盡空階又短牕

分賦畫梅

蕊冷香寒賦不成新詩正愛是無聲蒼黃頓欲千枝掃
磅礴先教一世驚竹外游心烟乍斂水邊脫手月初明
百年絹底難搖落任爾愁中玉笛橫

照水梅

寒烟空一徑素月下孤嶺四顧欲語誰水中自照影

余于乾隆庚戌得交寧州董勿軒勿軒爲余言吾鄉有
劉寄庵先生者才大而博學醇而深少年登上第爲山
東宰有循聲因公累從吏議當謫山東之民奔赴闕
下贖先生 先皇帝察先生廉免之余聞而心儀焉恨
未見其人也辛亥冬從吳和軒處識先生面溫柔敦
厚粹然儒者之容是必有得於詩教也時先生將行
匆匆別去未及見 先生著述鞅鞅者久之歲己未勿
軒出 先生潭西北征及大明湖詩二卷相示余始得
讀其詩蓋以陶爲宗而出入於儲孟韋柳讀旣久覺此
心浩然陶然然後進而推 先生之心乃眞與造物者

游一切不足以櫻之者也嘉慶庚申爲今上卽位之
五載有特旨命先生赴京旣至引見後仍以前
職揀發山東當是時先生之名滿天下夫縣令親民
之官朝廷所重然論其秩不過七品耳自郡守監司以
上得此且難矣况以一縣令而上邀兩朝特達之知
誠千載一遇哉先生在山東數年洊擢府丞以母老
陳請乞養天子憫先生孝予歸王會城五華書院
如潘黃門閒居故事以板輿迎太夫人躬親色養日
則與十三郡之士講求古人善世淑身明體達用之學
暇則讌集同鄉耆舊揚風扞雅歌咏昇平壇坫之盛不

讓中州蓋百餘年間吾滇始逢此盛事矣歲乙亥先生續鈔詩成又若干卷余因之感焉歐陽公謂詩惟窮而後工若富貴之人其知此者亦少矣卽有知之者亦不樂爲之卽樂爲之亦不暇先生固不言富貴而儼在富貴之中乃自少至老曾不易其所好是天將以先生主持一代之風雅也豈偶然哉余鄉曲鄙人名不動公卿學不趨時好先生不以爲不肯且欲索序於余余何敢以序先生之詩願嘗念司馬子長傳伯夷以爲附青雲之士始能傳於後世余之爲序亦區區赴驥之志也夫嘉慶乙亥長至日浪穹後學楊淳謹序

寄菴詩鈔續十 乙亥

雲南劉大紳

游寶華寺至湧泉寺

游山不飲酒，喚僕問升斗。聞道紅雲多，不知落誰手。策杖如策龍，且尋青芙蓉。傾酒有餘瀝，沾漑及羣峰。遂作登仙想，行託白雲上。白雲未可期，相與發高唱。山僧偏厭山，急欲辭山間。送客紅日晚，明月來松關。

僧借竹杖

一枝青竹杖，相借入雲峰。不敢陂中棄，回頭恐化龍。

留謝石臞小飲

新歲裁相見春風冷几筵魚賒留飯後酒罄說詩前出
戶繁燈火歸家剩管絃此間無布被難與對床眠

過金碧草堂桃花盛開

春風過門不輕去認是年年賦詩處亭前灼灼桃花枝
牆外依依楊柳樹桃花不嫌客來往只恐楊柳易迷路
訔然一叩雙扉開白首弟兄笑相顧茗爐烟淨松風鳴
花甕甌間瀉甘露鄰家開落已多日繡幙重重此深護
蓬萊仙侶情何深飄忽雲烟到無數銜泥燕子初營巢

遲迴半爲社日誤花紅葉綠不眴眼一年幾回花下住
人生嗜好今昔殊莫怪劉郎說前度且喜新詩不如花
花若有知不我妒

對山大椿昆弟招同張柏軒楊蓉初飲郭氏園

人生局促何爲者問柳尋花自瀟灑吾家兄弟如惠連
借得園林置杯斚張侯遠自秦中來玉山九仞高崔嵬
盈川人物最難得衰朽亦復相追陪是日天氣忽寒冽
羊裘蒙茸怯飛雪斗然入座春風生七條冰絃未凍折
映華山頭春草青靈禽欲語魚出聽隔牆外人密於織

竚立遙指行雲停此時無詩有詩意筆雖未落興已至
筵終緩緩追亡逋袖拂紗籠盡細事晨風吹送車馬過
燈火星月光輝多聞道歡娛亦蕭瑟不奈四壁塵封何
亡形賓主豈易有文采要留百年後有殘花柳無殘詩
更酌瓊卮起爲壽

時柏軒鼓琴數曲

飲倪輝山樓上

行盡湖邊路羣山擁上樓先生居自好我輩到能留題
句侵堦竹銜杯狎水漚沉沉春酌後更欲問輕舟

哭段昭文

謂子天以人惟人實風雅謂子天以詩惟詩自瀟灑上
有不測之青天下有無底之黃泉昂昂七尺生中間吟
哦遂至戕天全子規二月啼不住血染春山紅杜鵑半
面路人心尙酸況我識子今三年我欲登太華非子誰
拂珊瑚鞭我欲攬昆水非子誰泛珍珠船我病子未病
子死我則痊衰存壯逝或有故心忖度之只茫然嗟哉
子之父七峰剩有詩千篇未能歲月齊彭殤子今又復
爾才人例豈皆鬼仙詩家天仙地仙誰屬焉彼司命者
寧無權是父是子緣獨慳白石先生如不死春風相向

哭桃李牆外荊棘千丈長
偪塞青雲從何起金碧氣色
都已矣

草堂惠蘇扇新箋

知蘇製扇巧如月隨手風生不曾歇
風清月白非尋常
草堂得之不珍藏一朝寄到行藥處
使我沉疴頓時去
又遺白幅新詩箋要令苦吟幾千度
樽前安得如老劉
今夜風月來山樓

草堂惠柚

縱教金百鍊寒柚鑄難成
星月分形肖冰霜得氣清
烟

雲初離樹擔荷蚤來城臭味差池易相期保令名

讀忠節錄改本

夜夢大星殞如斗聲作霹靂振林藪朝來客授忠節編
明鄉先生死賊手賊不死公公矢死頭斷唾罵始絕口
闔門知公死如生有不死者卽義狗惟公忠貞世所希
惟公才畧亦無偶賊守少懈公謀多蠟書付弟間道走
鬼神不欲公獨死亦不欲公獨不朽畢節城裏兄橫口
散納溪頭弟授首問公何官曰同知黔陽大吏豈無有
至今一百六十年人道陰風夜夜吼

讀范希文金在鎔賦

宋家三百二十年第一流人范老子當其身爲秀才時
便以天下任之已一朝試賦金在鎔平生志功見於此
區別妍媸平禍亂軒鏡干將吾與爾古人謂詩以言志
移品公賦無溢美雖然空言切何補亦視其人何如耳
此賦若出呂許公言行背馳正可恥歐陽怪事勞周旋
精金粗鑛妄相比惜哉邊功未及竟知政事裁一歲止
誦詩讀書要知人知人不自將相始何人能仿顏柳書
爲書此賦千百紙

海門橋

是誰憂汎濫到此設重門隔岸人烟密當橋市語喧繫
船同綠樹駐馬共黃昏可怪分魚界湖邊片石存

仰山邀看芍藥花兼以詩速賦答

自許尋春眼界寬今年臥疾怯輕寒名花不似清宵月
卷却疎簾便得看

醉花醉月自嫌遲欲借驂騑亦不癡長記前年客初到
飛來蜨蝶已多時

金碧草堂賞芍藥分韻得身字

桃花柳絮飛香塵殿春婪尾能留春仙宮一百二十樹
年年題壁酬花神好風吹入天上去觀門鞍馬時逡巡
城中城外氣色減鄙人病起長欠伸陳侯心花忽怒發
袖出老手參洪鈞一朝庭幃悉爛漫尊壘傾倒延嘉賓
曾經昨日相問訊第見高柳垂池瀕繞牆戎葵競秀發
不聞芍藥花枝新蜂來蝶去皆心訝陳侯不語祇微嚔
世間萬事休認真傀儡場中好容身後談學術并經綸
依傍名儒與名臣桃梗土偶齊笑嘆何如此花驚四鄰
刻玉繡綵原相因縷冰剪水還苦辛陳侯陳侯君可人

讀呂不韋傳

奇貨居來不保身史遷猶說是聞人
那堪黃歇依成局儼有牛金步後塵
未得世家如呂尙空將兒子付嬴秦
著書亦欲傳千古剽竊姬周又亂真

白芍藥

當階紅藥正翩翩別有花枝出小園
同向春風齊著力偏如臘雪尙留痕
陳青玉案心猶歛隔水晶簾手欲捫
不是狂香時競發只疑明月到前軒

倪竹泉給事邀同諸君子賞芍藥

我有白芍藥移自故人家連宵月色澹無影姮娥閉門
羞見花此如揚子雲草元只尙白雕蟲篆刻渠不爲我
與故人正披索羣仙却在蓬萊宮花海傾出長袖中青
帝已整赤虬駕瓊筵一醉留春風明日立夏當門湖心水盡
立龍鱗之而角濺濺吞吐卵大明月珠閃閃爭光不取
拾姚黃魏紫飛塵埃紅鳥啄破青蒼苔山中茶花不勝
事依傍藥闌十分開掖垣給事暖了了驚看雲霞我輩
老低頭第吸琉璃鍾未敢人前出詩草給事相顧笑不
休曾經騎鶴上揚州三十六種題欲遍歸來假口聊銷

憂金庭茅廬本難偶
謝朓清才豈易有
願得明年金帶圍
分插朱顏與白首

戲學草堂攢花盆中頗有奇致

剪綵無生意攢花有秘方
三危分露水五色散雲囊
一笑童心在頻拈老手香
春風可能爾欲與問東皇

金碧草堂留題

連楹近市直如村
宋玉宅邊庾信園
招隱鮮鱸常作膾
養親慈竹尙留根
依人杜甫空憂國
乞食陶潛正叩門
知信仙家多福分
城樓移得自崑崙

甲第齊雲付海城故鄉山水正多情不妨見客時忘姓
可笑看花盡務名壁上蝸涎侵舊帖牆邊蟻語雜新聲
醇醪半醉無餘事臥聽佳人弄玉笙

床頭錯落古銅尊好客終年不閉門倚瑟歌樵桃葉渡
煎茶水汲菊花村前軒月暗張燈影小徑泥香踏草痕
守廁劉安腰手版神仙富貴不堪論

賦歸何可無安居似此優游自有餘外繞千竿長短竹
中藏萬卷古今書前門地濶堪旋馬後圃泉饒足種魚
笑栽草堂曾買盡明年聊且結茅廬

孔顏所樂何事六首勗諸子

昔我孔夫子疏水枕曲肱其心視富貴如雲浮大空豈
無下士笑大賢步趨同乃知化時雨不獨坐春風
去聖世以遠利欲熏人心申韓刑名蝕楊墨物我侵下
流逮蘇張縱橫徒相尋夸耀及孺婦位高多黃金孔顏
樂其樂孰與窺高深

絕學一千載皇天眷有宋濂溪周子生長夜醒昏夢繼
以二程子世知有道統當時占五星蚤識儒術重君子
引不發能者盡景從

謂貧始可樂豈無世胄子謂貧即可樂何以喪廉恥逐
境求樂趣樂反爲境餌神仙談鼎爐釋氏述宗旨得書
不得訣飲藥加病矣晉人師老莊自謂樂無比陸沉及
神州延禍靡所止是必有事焉不羨古無死

側聞子淵氏仰鑽瞻忽閒如鑿九仞井如登千尋山意
在及泉止寧甘半途還旣得師聖人爲聖原非艱其功
在博約循循然躋攀青雲有鳳鳥廁鼠憫愚頑神駿騰
虛空驥駟難一班揚雄謂之苦是惡知孔顏

我於聖逾遠童稚讀論語白首猶茫如希驥絕去處雕

宰固無術鑄顏必有所第能事其事堂奧不終阻夫子
甚賢回點也亦深與見大則心泰茂叔啓其緒吟弄風
月歸堯舜吾儔侶第恐功力疏聖賢遂齟齬三復子淵
言有爲固在予

合壽木

天地吾棺槨隨人市美材刳桐嗤禮儉鑿石笑心灰此
日生焉用他年死便埋編詩還幾卷暇日且銜杯

明道先生教人靜坐二首

聖道日湮塞門徑埋堀堞後學無師承擾擾事相左夜

蛾撲燈滅春蠶吐絲裏紛紛少寧居希賢誰能那二氏
乘虛入其教迺遠播面壁旣已怪閉關更可唾如何程
夫子教人亦靜坐

上天靜以高大地靜以厚聖人處其中主靜法悠久七
情無偏倚端倪乃固有枯寂空默默坐馳又失守惺惺
徹始終惟敬爲樞紐是惟周濂溪心法相授受蜀洛雖
異趣此道不輕否一日如兩日所得僅塵垢

送諸子旋歸

四座生秋風兩月積陰雨賴有三三子論詩時起予負

笈紛紛然長揖向何處離酒斟如冰未能傾肺腑野燒
焚芝蘭抱根委泥土元鶴別孔鸞垂翅難起舞況我師
弟間不追亦不拒相思苟不忘相期各自樹唐賢重器
識下流易竊取東漢矜氣節地天此維柱賢愚同百年
居今好希古

賦答高用康

酒寒未成醉賦詩淚潛潛天地廣且大此去何所患歸
雲不顧雨墜石不戀山棄夫與棄婦不乘故車還自念
我與若難同雲石頑在魚水有鰈在鳥林有鵲惟恐一

分手相思損容顏過從易尋路絕頂偕登攀下界絲竹
寂上方風日閒無爲畜虎豹客至門常關

寄答趙復成

飲酒怕飲送行酒折柳怕折送行柳出門卽是長短亭
熏風變作冽風吼隔城十里神仙居山中好讀娘嬛書
只疑相思已無夢周旋王室忘茅廬昨宵燈前淚猶泣
山雲不深溪水淺魂來魂返勞如何我輩別離總難遣

寄陶達甫及諸子

悲哉別離不在遠隔屋連牆且繾綣一重城門一重山

山門亦是有關鍵不知相送經幾秋未曾半日同優游
君家松風夢如故良朋共住三層樓知己莫愁世人少
猿啼清宵鶴鳴曉石怪木客皆可兒青白眼睛定了了
今年風雨如挂枝窺窓便是淋漓時若令崇朝見天日
攜酒來和登山詩

題史彬錄後

殺運猶未退靖難兵已起燕家烽火高照見宮門水成
王不識周公心遠遁蠻方幸不死皇帝出亡老佛歸周
公兒孫又天子南中至今有遺墨多書壞牆不書紙遜

國致身詎爲誣儒生臆斷乃無理宮中火帝已矣燕君
臣篡賊耳

久雨

春風不遣溼雲散
淫雨連綿及夏半
大麥小麥芽潛生
菰豆連莢作泥爛
秧田中幸有水
移根未固決其畔
雷公驅龍走難住
北斗左右掣飛電
天漏欲補升無梯
况是長空倒銀漢
乍見金烏來扶桑
生畏蛟鱷急奔竄
來雨勢倚雲勢
雲不殷勤雨應倦
呼籲飛廉及虓虎
風吹乾百州縣
夜短厭聞雨淋鈴
開牕常將月華看

寄武尙賓

一朝復一朝一夕復一夕師弟不相見歲月恐虛擲都
言陰雨多泥塗絕行迹畏雨如畏人天晴未易獲談心
與論道樂固忘寢食言詩見本志亦足廣忠益神親卽
形親鬼神豈能厄出視長街頭赤日曝青石

聞盧天行叅將歿於緬寧長歌代哭

山東寂寂旣無相山西落落亦無將長白鵬綠應運生
經文緯武莫能尙如君豈是偏裨材西南邊隅有保障
王猛議論謝安策萬里封侯志何壯昆池一到一寫心

士卒周環笑孟浪朱程弟子韓范師不識誰爲丈人行
去年緬寧資坐鎮書生別離易惆悵男兒含笑看吳鉤
上馬肯聽驪駒唱方今四海狼烟消將軍歛盡熊羆狀
銅標鐵柱生蘚苔羽扇綸巾埽烟瘴仙家丹經費箋釋
迂儒狂客勞過訪遙想故人相思處大星耿耿懸虎帳
無端傳聞中心愁一代英雄已淪喪令子作吏天一方
返骨幾時可歸葬聞君每攬有司政循良聲名守令讓
卽今辮髮雕齒人長將淚痕灑弓韞七十老人筋骨弱
寶磨鏡具慚以向作狀他年上史官范陳以下欲依傍

寄書報與蓬萊翁定有哭聲出海舫

寄答張月川

月川以荔枝及詩遺余函達而荔枝空矣

佳句吟哦未及終急呼小史問筠籠只疑顆顆連枝葉
香色烟燼六月中

八乾舌本已津津覺有饑涎墮地頻不博傾城妃子笑
那堪一騎出紅塵

聞產純甘蜀產酸君謨有譜亦曾看擅名不記誰家好
只記牆頭買得難

竹園深處數停驂風物依稀似嶺南餉客不逢佳果熟

言來咄咄又空談

樹底聲聲唱竹枝鮮新帶露摘來時
幾人有福能消受
寄園君寄詩

君詩一字一明珠
領畧終身味不殊
五月嘗新三日變
山人蚤卸絳羅襦

鄧川楊烈女
名拒祿

鄧川楊家烈女子甘爲饒生子英死夫死婦生獨何心
極難是未成婦耳烈女死義非死情陋儒竊竊訾輕生
貞觀賢臣尙愧汝國士伏劍空求名

碧雞關

關前不長碧梧枝去馬來牛日午時一路桑陰雞亂叫
孤飛白鳳少人知

金馬山

漢家通遼古梁州萬里旌旄擁驛樓恨是黃金如馬小
神山空自騁驂騑

烏雛吟爲侯韓五兄弟作

烏雛巢柏樹啞啞啼相向羽毛未長成慈烏失所仰夕
畏探巢兒朝愁執柯匠上看青冥天遠窺白雲嶂禽鳥

雖細微日夜心惆悵巢中有巨雛中懷更悽愴受形同
父母伯兄固無恙憔悴拾蟲蟻衆雛引饑吭向使無巨
雛幾不鼎鑊葬孝友完本心詎思厚報償性情各自有
應作反哺養鵲鳩好追逐參商莫俛傍參商祇三星東
西不相望晨昏散光彩羞照柏樹上漢家春粟謠魏宮
燃萁狀請聽雛鳥吟末俗挽風尙

六月晦日答高用康留別

世路多山川人情足離別古今千萬年豈爲一時設我
輩偶相值苦在肝膽熱昨日辭山中自顧形影子咫尺

望雲烟重重復疊疊
山中人又歸風雨不斷絕
買馬綠耳稀仗劍白刃缺
今日是晦日何處照明月
遙遙孤館中懸燈憶明滅

父召禮無諾何能計
風雨爲壽高堂前
征衣亦楚楚汝歸未卽來
汝親最愛汝汝歸應卽來
師弟傷索處流螢池畔飛
啼鳥樹上語異地無異情
莫遣相思苦晚節黃花香
秋風獨吹予坐待君來時
一樽醉塞圃

送宋紹六

近莫近於長相思
千里萬里時見之
遠莫遠於不相識

同堂對面如九疑嗟我與君究異若聚烟散雲判今昨
寶珠山頭望五華只隔苴蘭一城郭來朝不辭路縈迂
歸裝直傍星雲湖倒流昆池亦有水風帆各自搖菰蒲
中間橫亘關索嶺其上出天下入井男兒意氣凌虹蜺
飛濺搖落赤幘影客久還鄉不可留晚春風雨聯新秋
此心縱欲託明月蟾光兔魄無處求問天何必有風雨
問地何必有險阻問人何必有別離毋乃實爲君與予
我今衰老君華年我如不去望君前一思七子讀書處
扶杖蚤到高樓邊

答李占亭

要作詩家第幾人
西南將趙好爲鄰
填詞只許花間集
使酒惟憐土窟春
絕世文章非險怪
凌秋意氣是鮮新
紫芝采徧華山曲
又向昆池問白蘋

七夕雨

一水隔西東
佳期盼望同
雙星無限意
盡在雨聲中
斜月臨河暗
常愁風浪生
鵲橋原自好
不趁昨宵晴

漫興

看遍雲峰復雨峰
不騎鸞鶴與虬龍
相思莫寄三山上

隔着烟波幾萬重

見月

苦雨相思是明月望見光輝興清發坐久又復懷故人
舊愁新愁不斷絕安能事事如我心從此不憂霖與霪
人無別離月常滿夜夜濁酒歡相斟

賦得堯夫猶空中樓閣

世間男兒半瑟縮插槿編籬寒茅屋空中樓閣誰相同
惟邵先生結撰獨老體孟用無人知不在飲酒兼吟詩
白源山中危坐處看徹十三萬年時

飲王玉海讀書精舍同謝石臞王渴園武尙賓李

占亭並遊螺峰山寺

千琅玕外幾青松松下兒童杳不逢
逕向鄰家門叩叩白雲猶自隔重重

一院中分兩院行紅牆碧瓦影縱橫
升天不畜淮南犬寂寂雲間吠客聲

石鼎烟消茗味香羣仙仔細辨旗槍
一聲玉磬來僧寺又詣東鄰問道場

旋轉海螺鸚鵡形長愁失足墜青冥
老蛟掣斷黃金鎖

乙亥
十七
直雨橫風射草亭

強捫石壁讀詩牌
姓氏文章半就埋
盡學許家書大字
天門鳳闕虎龍偕

危閣遙看樹杪飛
流丹聳碧世間稀
虛空實際分夷險
何似攜壺坐翠微

歸從精舍醉瓊蘇
欲寫螺峰雅集圖
休說將軍遺像在
知曾值得一錢無

題畫撲蝶扇

一雙蛺蝶最娟娟
玉腕輕舒撲午烟
楊得粉痕留扇面

滕王舊畫不堪憐

輕薄性情遊戲心
乍去乍來如花陰
閒庭姊妹誰先得
笑賭搔頭碧玉簪

答楊鳳池

相畏由檀子相知
白董生身貧人不
賤才大世難輕籠

底羣雞啄雲間一
鶴鳴別離經兩載
會合歎浮萍

鳳池爲默

齋先生高足弟子
與勿軒稱莫逆交

寄到新詩卷清秋
雁唳宵愁懷今杜
甫雄略古班超自
以文章著人將富
貴驕由來天下士
豈合老漁樵

中秋四首

秋天如不晴明月何處有抱此區區心瞻望惟恐後何
切今夕間清光不相負明月自終古浮雲不長久
大如寒蛟潭沈沈窺見底月如驪龍珠團團出積水舊
恨銷既多長歌曷能已未知明月心相思可如此
明月不易得況是中秋夜而我四代人團樂坐風榭希
世此難逢擎杯無時罷更聞長笛聲滿院飛玉掌恨別
與歡合胷懷各不假

前宵客有約明登太華山山月異城月光生湖水間俗

緣旣已重靈境難驟攀佳期且改卜福分應未慳心知
後夜月不獨照朱顏

招陶達甫游西山

空有西山在城中只遠看閒人何太少樂事不輕干杖
底尋詩易船頭載酒寬孤亭相待處秋月未曾殘

李占亭邀遊羅漢巖過吳道士開路處小憩朱家
菴夜宿三清閣同張雲卿

高樓倚明月夜夜延清影尙恨塵緣多未上西山嶺詩
人買舟楫相與快一逞前行莫迂遲佳處徐徐領漸出

荻蘆港已造空明境未知孝廉船幾時得合併

王玉海
先三日

北風吹船尾送到湖上山神仙宮闕多攢簇巖巒間只
疑無路上猿猱獨躋攀舍舟策短竹焱風吹不還幽人
杳難見一泓水灣濃

謂牛

煮茗即中冷方隅限南蠻萬

事類如斯嗜好嗟愚頑

聞有吳道士筋骨頗堅勁愁見鐵鎖橋入與山爭命用
盡半生力欲爲山中平斗上烏觸籠斗下蛇赴窰一孔
開中間窺天人出井大笑謝靈運意氣枉自橫惜哉三

十年所得祇一徑石室勞斧鑿反傷自然性來遊無智
愚題壁互相競儵忽報混沌毋乃與同病

寒風入洞口此間難久留歸宿白玉京仙家有瓊樓明
月不肯出蚌蛤還嬾遊魚龍混水天不辨沉與浮依稀
見漁火一點來中流聯床皆吾輩風雨誰復愁

朝霧滑石磴芒鞋不可著太華與華亭無由償夙諾同
屬世外境久住都不惡風花及雪月隨時可酬酢愧乏
仙人奕難與天帝簿凌秋且一醉高懷寄寥廓

先天閣

第有烟雲跡高寒不可留羣山皆下顧一水自西流漢
使移金碧天威策馬牛當年未歷覽草木尙含愁

次日和占亭雲卿下遊羅漢寺

已從天上宿更作半空遊酒興昨宵欠詩名今日留巖
光低壓屋水勢濶吞樓七子無人到湖山正自愁

朱家菴二絕句

絕壁風吹水氣腥人攀鐵鎖度青冥不逢撒手懸崖客
長恨劈山無巨靈

斧柯卅載鑿山腰不用凌空駕竿橋穩向朱家菴子坐

畫船飛上玉人簫

賦金線魚

漁家傍湖在水族日經見罩罩深穴魚賣時指金線常
鱗減價值珍惜豈容選水清魚味鮮水濁魚味變入網
溷泥滓只供俗兒饌不聞山人言城市且欣羨

題張達觀遊老君山記後

荒山萬古待題名餓虎饑蛟避客行可惜臨潭還膽小
虛傳冰雹廢歌聲

橫刀列火米城中四顧無人亦自雄忽聽深林來笑語

先秦水客正吟風

曉日矇矓見雪山置身萬頃白雲間煉丹聞有周人在
不乞千丸大藥還

一樹珊瑚網不收曾無如意碎山頭龍君若解相持贈
歸插迎風縹緲樓

樂固坪招飲菊花籬畔同段可石周菴堂楊春庭

得餐字

少壯讀丹訣延年傾露盤每當重九日長嘯憑雲闌菊
蕙苦不辨把向秋霜看客邊逢名士旦夕叙溫寒今晨

盥漱畢折簡橫窗寬綯爛寓平淡節華生牆端我輩皆
閒人卽君亦冷官觴咏兩不厭但恐枝葉殘當門同一
鉏憔悴如春蘭緬懷舊邱里晚香淩以繁置酒邀故人
感時難成歡因君幸一醉隨與加午餐好爲隔年約此
地重盤桓

伯玉亭先生游郭園同諸先生

我聞晉山簡習池日優游又聞羊叔子峴首涕橫流山
童池復涸覽古將何求傳人與傳地兩者端有由我公
制南徼滇黔盡懷柔偶然乘佳日却蓋辭鳴騶肩輿任

所適尋壑經林邱小園僅若掌不稱相唱酬寄懷別有
在延枚還召鄒對弈不賭墅采菊香盈甌持蠡稻正熟
笑說無監州四座風微和燕雀紛嘲啁尙緣登高後記
得經清秋惟公後民樂實能先民憂端居不游豫何助
抑何休吾徒半衰朽相如誰復侔常恐夕陽下欲爲明
月留遙望五華嶺巍峩祠漢侯卑哉祐與簡毋乃童子
羞

玉亭先生賜母氏鮮鱉

翻雲蹴浪趁香杭遠道初來價不輕下客無能偏設饌

小人有母又嘗羹餐加菽水承歡處禮勝雞豚養老情
回首海瀕封鮓日霜螯空說內庖盈

昨日招陶達甫遊西山不至頃見詩四章則已游
歸矣因題其後

風雨招難至相思付水瀕忽聞騎鶴背如見釣鰲身明
月偏憐汝青山不屬人有詩題絕壁誰與共岫嶙

重賦羅漢崖

滇池西流水不涸華山北來插其脚波濤震撼無朝昏
寸土尺壤盡辭却斗然壁立千仞高青芙蓉峰秀如削

撰雲結霧憑虛空下臨不測上無著蟻附猿騰始得上
鵬飛鰲奠駭交錯何由仙佛緣分多抵隙投閒置樓閣
倚欄笑傲湖山磨水湧鯨魚嶺飛鶴咳唾未曾到人間
珠玉只向九天落絕境尙嫌秘鬼怪笠影筇聲遍尋樂
側足垂外逾二分兩手強攀朽鐵索性命慣向游覽輕
多謝吳剛利斧鑿大醉穩臥白雲裏連宵風雨故相譌
陳言娓娓山靈羞流傳徒供世嗚噓好放弟子出頭地
秋空明月入簾幕陶達甫遊山詩極佳歸來已是兼旬時誰信今
朝興復作晴軒續成詩一篇明年重游此爲約

九月下旬燕游歸化寺分與字韻

春秋不相貸歲月尙吾與曉上古蘭若晴烟集儔侶草

木未黃落鴻雁客何許

今秋雁賴

茲離下花采采酒堪煮

山僧最近人品茶久笑語訂約青陽辰重來莫延佇人
生偶游衍亦復關出處我輩有行止山靈無迎距太息
牆西碑幸免供白杵褒慎皆蜀產文辭抗齊楚程封重
刻之娓娓爲後序削去僞周字榻本可藏弄盛名未敗
露誰辨虎與鼠廼今羨王楊鸞鳳後先舉窮不希顏曾
達豈志伊呂悠悠金馬山寄慨寧獨予

遙和玉亭先生游山寺

聞向招提去高僧且讓清取攜山月影迎送石泉聲餘
興酒杯窄滿懷詩草橫往觀人夾道鼓角不相驚

送別何竹居觀察移任黔中

才見持節來忽聞整旌去賢者自難得此行亦何遽班
馬鳴道周泣下非一處挽留苦無計徒然怨長路

鳳雛出丹穴龍駒來渥洼其父非名父生兒安得佳惟
公貴公子年少躋玉階
帝知世德選寵錫韓范偕
南人昔何幸瞻拜殊凡儕

國家法令密親黨防比周姬呂不世出分土爲諸侯規模著當代泊安實良籌堂堂今方伯與公爲好仇滇疆兩賢並斟酌移黔陬黔人日以喜滇人日以愁

滇南本福地鹽政久畫一蕭規曹隨之百縣盡安佚蠶桑衣所自學校才所出樹木計明年樹人不終日旦夕勤作育期得賢輔弼龍鸞有本性豈爲鸛鷀嫉禽魚幸游泳淵叢保無失

離別在崇朝君子心亦悲後來皆賢者於我寧棄遺野人終耿耿短歌當豐碑相思我能往見面應有時終是

再來好金碧望旌旗

十月十三日聞袁十三蘇亭已死

未死便傳死及今真不生難忘遠遊子長恨異鄉情邱
壟埋風雅山川失老成遙知寒夜月空向選樓明

螳川憶昔遊作客共錢侯送暖泉如玉迎涼月似鈎假
年期百歲餘事足千秋來往成三老何堪剩老劉

新興張烈女詩

諸生鯤女字同邑魏氏子嘉慶乙亥八月十三日殉夫死井中

張家女兒未成婦身不殉夫亦無咎清秋白日當空寒
照見井水無波瀾不能同生能同死翠羽明璫赴井底

銀牀從此光輝多張孔徒自汗清泚魏家男兒應有知
含笑携手星月時爲語鄉人慎無塞樹女貞樹表女德

新興王貞女詩

泰女字諸生馮恒煦嘉慶乙亥秋
恒煦死女歸其家代養姑與祖姑

女亦同時病
疾未死者

疫鬼殺人無厭時捨一女子將成之閨閣不識鬼神意
未婚重字原從宜獨歸夫家奉晨夕徒拚一死尙無益
扶持正氣旋乾坤貞女門前鬼匿跡

始上海天閣同屠夢亭

不信城中境似仙園林窺後悔從前最嫌積水皆名海

却喜披雲卽見天此日何嘗少風雅吾鄉自有好山川
登臨若值清秋夜坐看晴霄皓月懸

陶令歸來自得羲皇之趣潞公留守獨高真率之
風老萊子之娛親斑斕戲綵白香山之結社詩酒
尋盟清修而里表孝慈教授則門題通德惟不愧
不作能兼至樂之三斯可咏可歌足備太音之五
如我

寄菴夫子樓峰望族陞嶺儒宗文章增藜閣之輝政事
紹蒲鞭之治民懷冬日正畫像以滿城子切春暉
乃舍簪於萬里爰補循陔之什益多言志之篇此
續鈔詩所由始也爾乃神清藻想氣馥蘭言頌堂

上之金萱詠階前之玉樹池塘得句比羣季於惠
連梁月興思同交情於工部謀酒於蒿簪之侶分
甘於瑜珥之孫問暇日之桑麻機鞋桐帽披閒居
之圖史石記竹書洵乎樂在家園展也聲存天籟
旣而奉潘輿於南郭施馬帳於西林望之者如斗
山式之者如金玉昆池綦履羣欽孫復人師華嶺
衣冠共識蘇湖弟子於是春風並坐夜月聯吟趣
則知水仁山人則迂幸短李或眺祠雞之岫或登
鳴鳳之岡擬郭璞之遊仙倣左思之招隱蘭佩羅

含之宅松哦孫綽之庭看思發於花前行行列繡
想梅吟於雪裏字字含香更若襄忠獎節發微闢
幽古藻紛披周情孔思名言絡繹方矩圓規潤石
宏辭播樂章而自可擲金雅韻參詩史而何虧讀
之者如元氣之早入肝脾效之者嘆驪珠之空餘
鱗爪斯所以主持風雅而沾丐藝林者也士林
蒙有素比興非工入茂叔之門吟風弄月列安定
之坐奏雅歌詩聞郢曲則媲美千人譬韓碑而願
書萬本恭跋俚語故誌瓣香

通海門人李士林謹跋

音於天地爲雷風著物成響行虛空霽霽元氣運
當中太初無始今無終迴旋四時摩蒼穹在夏勃
勃春蓬蓬又或凝閉成秋冬當其震奮山澤通眈
眈砰礚揚元功谿谷谿呀洞涇澌水石激盪相撞
衝木枝草莖起塌墜扇竅動孔吟微蟲胆旁注翼
股與胷大鳴小鳴殊拙工天地人賴將毋同發言
爲詩氣所充長短高下皆由衷雷有殷震風雌雄
咄哉

夫子元氣鍾呵噓陽煦敷腴濃寒瘦颯瑟屏無庸商

量徵角調商宮鏗金石羅列絲桐五音繁會鏘鏘
縱從軍關外脫其轡不震不動挺栢松和感萬籟

額

宸聰潛轉造化開瞳矐桃花白雪迴通窮卓犖吐電舒
長虹邊笳塞馬供橫縱存詩養疾居於東軒軒風
骨迺鸞獅吐納漢魏規唐蹤排冪妥帖剽駁踳胡
盧刻鏤雕青紅謝政歸來携短筇壓軫篇什盈筇
籠歡承

北堂樂融融白華潔白南陔豐成已成物道大公高

懸絳帳陳金鑪入座和光生襴褕矍鑠清神炯雙
瞳直書所得教孝忠詩成當之無愧容扶植節義
管標彤創音造響光熊熊轟然實大而聲洪碧雞
金馬誰正宗壽以梨棗山爭童頃刻紙價騰洛嵩
我爲詩歌寫鬱隆如操寸筵撞鴻鐘時正嚴冽冰
霧凜十指皸瘃心倥侗欲吐格格當啍噏揚塵堀
堞唸寒蛩不羞蚯蚓名蛟龍

宣威門生陶致用呈稿

經騷而降風雅聿宣各朝詩鈔汗牛充棟矣生今之世而欲言詩微論至理名言先被古人占盡卽間發奇思偶得佳句亦不出古人籠罩中誠難言哉余竊謂本乎性情則各不相襲古今來才人韵士佳作如林未始不錚錚鉸鉸麟麟炳炳而言不由衷品不稱才論者每有遺憾焉若夫正人君子抱經綸懷忠愛偶興酣落墨振筆疾書不過聊抒胷次而滿腔真氣自盎然溢於行間此老杜所以爲詩家正宗也由是觀之則求諸聲律今人可不必有詩本乎性情今人又何必無詩乎如我

劉寄庵夫子早占科名歷登仕版德政浹淪青天得號
仕優則學不輟絃歌并包書林翱翔文圃以故詩古文
辭靡不擅長海內名家咸傾慕焉嘉慶甲子乞養歸田
大憲重咸夫子之品學請掌五華咸亦得傍門牆侍

講之餘竊見

夫子和光可挹道貌可欽師弟之間

謫如父子課文已卽畱心詩學每命題必自作一首以

爲諸生式

咸

每讀之嘆其如長江巨浪金鐘大鏞使人

捫索俱窮細而按焉又復溫柔敦厚遐哉弗可及已旣
得展誦續鈔全集始自丙寅迄於乙亥凡數百餘篇其

天籟之發見者如對月則常戀彩雲生日則願祝松柏
縣懼刀兵心傷舊治期愆雨旱念切村農以及表揚忠
烈啟廸門人皆語語從至性中流出他如著屐登山拄
杖訪友隨時尋樂遇物適興亦莫不得性情之正而又
無一字無來歷也遙哉弗可及已命咸作序咸才非吐
鳳技祇雕虫縱有微言奚闡大雅因念甲戌之春負笈
五華臨行家君命曰寄庵先生吾渾偉人也汝
得從遊乃爲深幸詩云高山仰止景行行止雖不能至
心向往之尙其勉旃是序也亦不過以願學夫子

而未能者一表出之豈真有當於夫子豈真有當於夫子之詩哉時嘉慶乙亥年陽月下浣之吉劔川州受業門人張咸照頓首百拜謹撰